

## KERWEREDD 1990

Ehr lieve Leit ich will eich begrieße,  
von Oschde, Weschde, Norde und Siede.

All wie ner do stehn, egal von wo ner a komme,  
häß ich eich zu unsrer Kerb "Herzlich Willkommen"!

Bei uns hat die Kerb zwar drei Johr geschlof,  
doch vorsjohr hannse die Landfraue werre außem Grab gehob.

Es Margot von de Poscht hat die Kerwered gehall,  
das war ganz efach Klasse - un hat jedem gefall.

Bei de Straußjugend han drei Johrgäng gefehlt,  
irgendwie war doch was gestehrt.  
Was seh mer do uf de erste Blick,  
das ware die Johre met em Pilleknick.

Doch das Johr hats dodemet gar kee Not,  
es sin genug Straußmäd un Straußbuwe do.

Sogar de Petrus ments heit gut met uns,  
un schickt uns gratis von owe die Sunn.

(Un dut uns a de Petrus grolle,  
alles Gute kommt von owe.)

Deshalb wolle mer zünftig die Kerb heit feire,  
e jeder soll Fräd han, un niemand soll sich eiere.

Jetzt speelt uns die Musik met Pauk un Trompete,  
die Nerremohrer Kerb soll lewe!

Musik: "Hoch soll sie leben, dreimal hoch."

Straußbuwe: Wem is die Kerb ...

Das Johr han ich eich einiges se berichte,  
es gebt große un klenne Geschichte.

Es gröschde Ereignis, do stimme ehr doch all in,  
das war de Mauerfall in Berlin.

Die Fräd war groß in de ganze Welt,  
doch wer bezahlt jetzt das veele Geld?  
Fer's Begrießungsgeld han die Leit stunnelang agestann,  
jeder wollt halt die 100 Westmark hann.

Angerast sin die Aussiedler met ehre Luftverpeshter in Schare,  
gleich wie die Grenze offe ware.  
Haschde dich uff de Autobahn umgeguckt  
un e Trabbi is an der vorbei gehupst.  
Das is doch net meglich, kommt der do in de Sinn,  
es kennt höchstens e Turbo-Trabbi sin.

A Nerremohr wurd net verschohnt,  
seitdem war de Paulushof werrre bewohnt.  
Am Afang war das fer die Besitzer e Riesecknall,  
doch 1/4 Johr später war das nimmi de Fall.

Do konnt mer in de Zeitung lese,  
wie die Genosse do owwe lewe.  
Die Abfliss ware laufend verstoppt, weil die anscheinend net wußte,  
fer was se de Klo benutze mußte.

Nachts wurde sogar Orgie gefeiert,  
das hat die Geib ganz schee geeiert.

Manche han gement, sie käme ins Schlaraffeland,  
awwer schließlich hanse doch erkannt,  
wann mer bei uns gut lewe will,

do muß mer a berabbe.

Do is de Zirkel und de Hammer net zum agucke,  
do muß mer a demet schaffe.

Die Musik speelt fer das große Ereignis von die Welt,  
„Wer soll das bezahlen - wer hat so veel Geld!?“

Straußbuwe: ...

Weiter will ich Eich noch berichte  
von unserer politische Dorfgeschichte.

De Stein hat einige Johre die Owwerhand,  
doch vorsjohr hat er als Bermeschder abgedankt.

Fer unser Belange hat er sich stets bemieht,  
jetzt hat er de Ruhestand sicher verdient.

Lang han se uns uff die Folter gespannt,  
wer kommt jetzt wohl als Bermeschder dran.  
Do han die Freie dreimol laut gebellt  
un no de Kommunalwahle de Neue gestellt.

Endlich im August do war Wahltermin,  
unser Karl Wolf geht als neuer Bermeschder in die Dorfgeschicht in.

No dem Motto - ehr Leit, nor Mut,  
neie Besem kehre gut - hat sich unser Neier schon bewährt  
un in de Mehrzweckhall e Schlüsselordnung ingefehrt.

Er sorcht a fer Sauberkeit in de Natur.  
Bei de Umweltaktione met de Jugend uff Tour.

Im Derf wurd e Spiegel uffgestellt - wie toll –,  
daß de Verkehrsfluß besser laafe soll.

Beim Jubiläum von de Werkvolkkapell  
gab sich unser Bermeschder ganz kulturell.

Dort hat er sich als Schauspieler versucht,  
samt seiner Fraa - der Ufftritt war gut.  
Sei Fraa war die Madam Chi, Chi, er Gumanchera von Mexico  
Die Gaudi war riesig - so was noch net do.

Jeder kennt unser Margot von de Poscht,  
stets gut gelaunt un immer flott.

Doch vorsjohr - es war in de Kerwewoch - do war's tief betrieht,  
do leiht morjens uff em Tisch e traurischer Brief.  
Liebe Mutti, met unserer Katz is es Sense,  
e Auto konnt anscheinend nimmi bremse.

Sie leiht wie e Heifelsche Elend uff die Stroß,  
es tut mer läd, unser Putzi is tot.

Das schlaht uff's Herz un geht an die Niere,  
denn die Putzi war so e liewes Tierle.  
Es war grad noch Besuch do un so hat mer am selwe Daa  
das arme Kätzje im Garde begrab.

Die Stimmung war gedrickt un owends so um Uhre Zeh,  
wollt's Margot noch e bisje frische Luft schnappe geh.

Es macht grad die Deer uff - ehr werres net glawe,  
so schleicht em e Kätzje regnicht um die Waade.-  
„Das gebt's net“, kreicht's Margot, die Putzi, sie isses,  
es hat se geknolchd - die Fräd die war riesig.

De Horst ment perplex - das is doch net meglich!  
Mer han doch die Putzi im Garde veewicht.

Im stremende Ree - es wurd em ganz bang,  
isser metsamt de Verwandtschaft ans ausbuddle gang.-

Die Musik speelt, so isses ewe:  
„So e Katz die hat zwee Lewe!“

„Katzenlied“

Straubuwe:....

In unserm Derf kriemer Tag un Nacht kee Ruh,  
es geht so wie einst uff de Neimiehl zu.

Sin die Leit nor fer zwee Stunn außern Haus,  
do schweife die Spitzbuwe sogar am hellichte Daa aus!

Mer muß menne, die Stramer leie immer uff de Lauer,  
das is doch kee Zustand uff die Dauer.

Geld, Schmuck un Waffe han se geklaut,  
sogar bei de Tiedemann han sich die Strolche getraut.

Doch der hat nachts Geräusche geheert  
un hat die Inbrecher ganz mutig gesteert.

Er is außern Bett gesprung in de Unterhose un ohne Schlappe  
is er denne Spitzbuwe no met 80 Sache.

So hat er die Verfolgung uffgenurnm.  
Die Diebe hat er zwar net kriecht,  
awwer sie sin bes heit a nirnrni kumrn.

Vorn Gänsehiwwel bis ins Neibaugebiet hanse ehr Uwese getrebb.  
Die Polizei hat vorrne Rätsel gestann - un recherchiert wie bedeppt.

Vorgang sin die Lümmel ganz profihaft,  
drum hat mer se a net gefaßt.

Die Musik speelt fer die Reiberbande do  
„De Kriminaltango“

Straußbuwe:...

Schon e 'paar Jahr isses Wetter schlecht  
am traditionelle Nerrermohrer Felsenfescht.

Doch dodefor kenne mer jetzt Weifescht feire,  
met echtem Nerrermohrer Fedderweise.

Das war fers Felsefescht e guter Ersatz,  
denn die Fels war voll bis unners Dach.

Un jeder konnt sich hell begeischdre  
fer em Bauer Walter sei Fedderweis.ser.

Mer kennt das Feschd vielleicht noch umrahme  
un die Wahl von re Weinkönigin plane.

So kann uff jede Fall nix me scheidre,  
im hechste Fall müßte mer vielleicht de Weiberg erweite.

Das war vielleicht e Asporn fer die Rentnertreff,  
die kennte die Fels urbar mache - war das net nett?

De Walter met seiner Erfahrung in denne Sache,  
kennt dann das ganze üwwerwache.

Aschließend kennt er dann die Öchsle priefe  
un dann kann jeder denne gute Nerrermohrer Wei genieße.

Mundschenk, du dich net so dricke,  
geb mer noch e Schluck von dem gute „Nerremohrer Moorbachzwickler“.

Die Musik speelt jetzt, es is noch ganz nei:  
„A an de Moorbach wachst de Wei!“

(Weinlied)

Straußbuwe:...

O Schreck, wie sieht's bei uns aus im Wald,  
e Däl is abgebroch un de anner leit do wie umgewalzt. -  
Das hammer denne Stürm se vedanke,  
wo im Friejohr gedooht han ohne Schranke -  
So was hat's bei uns net geb seit Menshegedenke,  
ehr Leit, an was kann das blos henke? -  
Irgendwie hat sich do e Ozonloch gebild,  
so kame die Stürm uff, wo gehaust han wie wild -  
De Wind hat geheilt - es hat alles gewackelt.  
Die Zichele sin vom Dach gefloh - es hat nor so gerappelt.

Es Stromnetz war unnerbroch - un es Enn von dem Fantom,  
mer wäre abgeschnett - un 12 Stunn ohne Strom –  
Das kann Heitsetag e Panik auslöse,  
schlimmschdenfalla kann mer gänzlich veblöde.

Es laaft kee Radio, kee Video, kee Glotze,  
noch net emol Kaffee kann mer koche.  
Mer kann net wasche - net bischele - net nehe,  
denn ohne Strom will efach nix gehe -  
Besonnerschd mer Junge komme do in Extase,  
denn ohne Pauer dut bei uns nix mee laafe.  
Drumm wär mei Vorschlag uff die Schnelle,  
in Nerremohr müßt mer e Notaggregat uffstelle!

Die Werkvolkkapell speelt jetzt met Getose,  
weil die kenne noch ohne Strom blose.

(„Lied met Pauer“)

Straußbuwe ...

Unser Metzjer is bekannt im Dorf,  
wörn frische Fläsch un seiner gute Werschk -  
Drum is a meischdens, wie mer sieht,  
besonnenschd samstags veel Betrieb.  
So war's a neilich amme Samstagmorje,  
do han die Leit noch veel se besorje.

Un weil em Kalli sei Metz gut geht,  
stehn die Mäd samstags se dritt hinner die Thek.  
Do werre die Leit all. prompt bedient - un uff jede Fall  
werd a noch klei e Schwätz;je gehall.  
Sin die Sache dann bezahlt - komme se guterletschk  
in e Tutt vun ehre Fleischfachgschäft.

Un weil die all gleich ausseh,  
is e Irrtum leicht gescheh.  
So war's vorkumm o Schreck - o Graus,  
die Inkaafstutte wurde vertauscht.

Die Fraa, wo sich uff's Rindfleisch gefräht,  
die guckt ganz verdutzt - uff das Stik Derrfläsch.  
Die anner Fraa, wo die Werschkcher wollt koche,  
die hot darin es Rindfläsch - die war vun de Socke –  
De dritte Kundin war de Irrtum noch net uffgefall,  
die hat sich unnerwegs noch e bisje uffgehall.

Die Musik speelt denne Verkäuferrinne alle drei:  
„Alles hat ein Ende ;iur die Wurst hat zwei.“

Straußbuwe ...

Im Mai war bei uns e *Hochzeit* im Derf,  
die will ich kerz erwähne heit an de Kerb.

Daß das a bekannt wer is unner de Leit,  
wurd die Vermählung in de Zeitung a gezeichnet.

E Geschäftsmann weeb - uff e Doppelzeich gebts's Prozente,  
un schließlich reschelt mer jo a met Glückwunsch un Geschenke.

Un deshalb konnt mer im Geschäftszeiger net nor die Vermählungsanzeige lese,  
es Dankschreibe das stand am selwe Daach klei uff de Seit denewe.

Die Musik speelt dem junge Brautpaare:  
„Irgendwo muß mer afange se spare“

Musik: „Und dann hau ich mit dem Hammerschen mein Sparschwein kaputt!“

Straußbuwe ...

Seit uff de Fels die neie Wertsleit residiere,  
klappt alles so gut, daß de Arweiterverei kann nei renoviere.

Es war a schon emol vorkumm, daß owends schon vor Zeh,  
de Schnaps knapp wer is - do hot de Heini e Idee.

Er nemmt sei Fahrrad, do brauch er net se laafe,  
un fahrt „Zum gute Alfred“, fer Schnaps insekaafe.

Denne dut er natürlich - es dut ne interessiere,  
bevor er ne metnemmt – a klei emol proveere.

Doch uff'm Rickweg - es geht Berg enunner,  
laaft sei Drohtesel so schnell - er war ganz verwunnert.

Bei dem Tempo konnt er die Ricktrittbrems schlecht finne,  
die leiht jo a so weit no hinne!

Er hat noch eriwwer un eniwwer jongleert, doch do wars baseert,  
beim Sturzflug hat er sich sei ganze Fassade demoleert.

Anschließend isser dann ins Krankenhaus kumm,  
dort hanse ne dann werre uff Vordermann brung.

Zu dem Glick im Uglick wär mei Tip in aller Stille:  
„Fahr niemols Fahrrad met Promille!“

Die Musik speelt dem Radfahrer im Akkord:  
„Schnaps, das was sein letztes Wort“

Straußbuwe. „Wem is die Kerb...?“

Jetzt will ich Eich noch e klenni Geschichte  
iwwer unser Straußnäd un Straußbuwe berichte.

In Kennels ehrer Garage hammer uns immer getroff,  
han die Banner geknibbelt un manchmol a enner gesoff.

Schließlich mußte mer uns fer unser Kerb vorbereite  
un dodezu geheert jo a es eiche.

Um e Kaschde Bier hammer noch gewett,  
do hat ens von unsere Straußmäd em Dirk e Stifteköpp geschnett.

Awwer, daß mer a geschafft han - gucken emol do owwe enaus,  
das sieht mer an unserm scheene, große Kerwestrauß –

Emol hatte mer sogar Besuch in unserer Garag,  
ehr werres net glawe vom e leibhaftische Rab.

Der hat sich ganz efach, der war ganz schee frech,  
mitte uff unser Tisch gesetzt.

De erscht Kommentar war - der kommt vom heilige Geischt, es war nämlich an den Pingschde,  
e annerer ment, er war vielleicht e vewunschener Prinz.

Uff emol saht do enner ganz monoton,  
der kommt von den Schrollbacher Straußbuwe als Spion.

Fascht wär der Rab unser Maskottche werr fer die Kerb,  
doch unser Bier hat em net geschmeckt - deshalb isser werre fert.

Es war meischdens luschdich bei unserem Haufe,  
besonnenschd beim Zelte in Nashane ehrer Laube.

Trotz Ree hammer ausgehall - mer sin doch kee Ducker -

un schließlich simmer jo a net aus Zucker.

Die Musik speelt unserer Straußjugend klei:

„Ener geht noch - ener geht noch nei!“

Was is die Technik heit doch fer e scheen Sach,  
mer hat do weltweit riesige Fortschritte gemach.

Im Frühjohr hat uffem Gänsehiwwel enner sei Rase gemeht,  
awwer wann's Gras schon so groß is, bleibt de beschde Rasemäher steh.

Er fangt a se mehe - es geht grad so 10 Meder,  
erscht hat er gemuckt - doch pletzlich do steht er.

So ging das e paar mol - er war schun am fluche,  
do muß er mol erscht in de Betriebsleitung suche.

*Zwischedurch* hat er dann met dem Kantemeher proveert,  
doch denne hat das hohe Gras genau so gesteert.

Die Brieh laafd am erunner - er schwitzt wie net gescheit,  
sonsch hat er Nerve wie e Drohtsäl - doch das do geht zu weit.

Mittlerweile war's schon owends speet  
un es Gras konnt mer stelleweis schon nowachse seh.

So ebbes dut em Toni net e zwettes mol baseere,  
eher dut der sei Wissegarde betoneere.

Die Musik speelt dem Landschaftspfleger vom Berg:  
„Wo isses näkschte Betonwerk?“

Lied: „Adelheid schenk mir einen Gartenzwerg“

Straußbuwe: „Wem is die Kerb...?“

Ich merk alleweil, die Glieder wern schwer,  
ach wann doch emol das veele verzehle net wär.

Ich men allemol, es langt fer das do Johr,  
ich han jo heit a noch was anneres vor.

Bevor ich zum Schluß kumme han ich noch schnell  
e paar Worte fer unser Werkvolkkapell.

Weil se so fleisich gespeelt han - un han net gepennt -  
bedank ich mich ganz herzlich im Name von unsere Straußjugend bei dem ganze Haufe metsamt  
Dirigent.

Ehr Leit, dun jetzt all die Hänn aus de Säck eraus,  
un gewe unserer Musik e kräftiger Applaus.

Ich hoff, daß ner all noch e bisje sitze bleiwe  
un noch met uns die Nerremohrer Kerb feire.

Awwer bevor mer es Esse uns Trinke genieße,  
durner se erschd noch unser Strauß met echtem Nerremohrer Wei begieße.

Du sollschd es ganze Johr iwwer henke,  
daß die Leit noch lang an unser Kerb denke.

.Straußbuwe: Wem is die Kerb...?